

E recompensa pa un cacho su amor pa su famia ta su cuido apropiado

Polis ta urgi comunidad pa tene cuenta cu **"Ley di Cacho"** ta vigente

E pilot program lo inicia den districto di Noord

FOR di dia 1 di juli Cuerpo Policial a cuminsa cu un

proyecto piloto pa cu e "Ley di Cacho", aproba den

Parlamento riba dia 27 di december 2012.

E proyecto ta encera e controlnan necesario relaciona na cumplimiento di parti di comunidad cu e "Hondenverordening".

A dicidi di cuminsa den districto di Noord pa atende cu e problematica di cachonan cu no ta ricibi e cuidu adecua, unda cu ta informa y conscientisa doñonan di cacho encuan to di e bienestar di nan cachon(nan) y di animalnan en general.

E proyecto ta hiba e nomber "Cacho den Cura", cu ta indicativo di e regla principal, esta cu cachonan mester ta den cura di nan doño y no riba caya of den mondi.

Tres agente policial ta encarga cu e proyecto y ta trahando for di e oficina di Polis di Bario na Jaburibari. Cuerpo Policial ta urgi comunidad pa tene cuenta cu e Ley di Cacho ta vigente y cu infraccionnan ta nifica aplicacion di boetnan, cuminsando na 300 florin.

Na momento cu constata un infraccion, Polis lo duna e ciudadano(nan) concerni un aviso-advertencia skirbi ("schriftelijke waarschuwing").

Si constata cu e ciudadano no haci caso di, no cumpli of no cumpli suficientemente cu e advertencia verbal, e agentenan policial lo duna un proces-verbaal, cual ta mara na un boet.

Cuerpo Policial lo ta controlando riba e



siguiente infraccionnan, cu ta mara n'e boetnan specifica aki: Cachonan cu ta los riba caminda publico, boet di 300 florin y si ripiti e infraccion e boet ta bira 500 florin.

Cachonan cu no ta na un looplijn corecto, boet di 750 florin y si ripiti e infraccion e boet ta bira 1000 florin. E cacho no tin suficiente cuminda of e calidad di cuminda ta "eenzijdig" y/of di mal calidad, boet di 750 florin y si ripiti e infraccion e boet ta bira 1000 florin.

E cacho no tin awa limpi y fresco continuamente, boet di 750 florin y si ripiti e infraccion e boet ta bira 1000 florin.

E cacho no tin lugar adecua pa sconde for di solo, awasero y biento, boet di 750 florin y si ripiti e infraccion e boet ta bira 1000 florin.

E cacho ta causa problema den e bario, manera blaf continuamente of tin un holo stinki pa via di higiena deficiente, boet di 300 florin y si ripiti e infraccion e boet ta bira 500 florin.

E doño of persona cu ta cana cu e cacho mester tene

e cacho na liña. Si esaki no t'e caso y e cacho ta cana los cu e persona, Polis lo aplica un boet di 300 florin y si ripiti e infraccion aki e boet ta bira 500 florin.

Si e cacho ta malo y Polis ta nota cu e doño no ta hiba e cacho veterinario, lo aplica un boet di 750 florin, y si e infraccion aki wordo ripiti lo aplica un boet di 1000 florin.

Cacho ta considera e mihor amigo di e ser humano. E ta un di animalnan mas fiel y obediente, e t'e animal cu ta cuida nan famia y cas cu mas entusiasmo cu cualkier otro.

Tene na cuenta cu nan recompensa, banda di cariño, t'e cuidu cu nan ta ricibi y e cuidu aki mester ta adecua.

E cacho t'ey pa cuida abo y bo famia, en cambio abo mester tene cuenta cu bo mester cuid'e tambe.

Cuerpo Policial ta corda nos comunidad cu tin cacho ta bin cu cierto responsabilidad y ta pidi pa tur hende tene na cuenta cu tin un Ley di Cacho vigente na Aruba y e controlnan pa cu esaki a cuminsa.